

CONVENIO DE COOPERACIÓN EDUCATIVA ENTRE A CONSELLERÍA DE ECONOMÍA, EMPREGO E INDUSTRIA E A UNIVERSIDADE DE VIGO PARA A REALIZACIÓN DE PRÁCTICAS ACADÉMICAS EXTERNAS DO ESTUDANTADO DA UNIVERSIDADE DE VIGO

Santiago de Compostela, 22 de xaneiro de 2018

COMPARECEN

Por unha banda -----, conselleiro de Economía, Emprego e Industria, en nome e representación da consellería en virtude do Decreto 148/2016, de 13 de novembro, do seu nomeamento e intervindo no exercicio das facultades que lle confire o artigo 34 da Lei 1/1983, do 22 de febreiro, de normas reguladoras da Xunta de Galicia e da súa Presidencia, modificada pola Lei 11/1988, do 20 de outubro, así como o Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia.

Por outra banda, -----, reitor da Universidade de Vigo, nomeado mediante o Decreto 47/2014, do 24 de abril, e intervindo de acordo coas competencias que lle outorga o artigo 20 da Lei orgánica 6/2001, do 21 de decembro, de universidades, e o artigo 58 dos Estatutos da Universidade de Vigo, aprobados polo Decreto 7/2010, do 14 de xaneiro.

As dúas partes recoñécense mutuamente competencia e capacidade bastante para formalizar este convenio e en consecuencia:

EXPOÑEN

Primeiro.

Que o Decreto 175/2015, do 3 de decembro, polo que se establece a estrutura orgánica da Consellería de Economía, Emprego e Industria, atribúe a esta, por unha banda, o exercicio das competencias e funcións nos ámbitos da promoción e dinamización da economía,

investigación, desenvolvemento e innovación, industria, seguridade industrial, metroloxía, metais preciosos, enerxía, minas e recursos minerais, artesanía, comercio interior e exterior, consumo e por outra, a proposta e execución das directrices xerais do Goberno no ámbito laboral, que engloba as competencias en materia de políticas activas de emprego, política laboral, relacións laborais e seguridade e saúde laboral, responsabilidade social empresarial, cooperativas e outras entidades de economía social, orientación e promoción laboral.

Segundo.

A Universidade de Vigo é unha institución de dereito público á que lle corresponde, no ámbito das súas competencias, o servizo público da educación superior. Está dotada de personalidade xurídica e patrimonio propios e goza de autonomía académica, económica e de goberno, de acordo coa Constitución e coa Lei orgánica de universidades.

Este organismo, como organización pública que é, está ao servizo da sociedade e ten como fins prioritarios, entre outros, a consecución das máximas cotas de calidade de docencia e investigación, a impartición de formación axeitada, presencial ou non, para facilitar a aprendizaxe do estudantado, a preparación para o exercicio de actividades profesionais ou artísticas e a obtención de títulos académicos.

Terceiro.

Na nova ordenación das ensinanzas universitarias derivada da adaptación ao Espazo Europeo de Educación Superior, ponse unha especial énfase na realización de prácticas externas con valor académico en entidades públicas ou privadas, nacionais ou internacionais, desde a consciencia de que a combinación dunha axeitada formación teórica universitaria co coñecemento aplicado das técnicas e das metodoloxías desenvolvidas no campo profesional, constitúe a base máis sólida para a súa formación integral, ao capacitalos correctamente para a súa futura inserción no mercado laboral.

Cuarto.

As prácticas académicas externas constitúen unha actividade de natureza formativa realizada polos estudantes universitarios e supervisada polas universidades, cuxo obxectivo é permitir aos mesmos aplicar e complementar os coñecementos adquiridos na súa



formación académica, favorecendo a adquisición de competencias que lles preparen para o exercicio de actividades profesionais, faciliten a súa empregabilidade e fomenten a súa capacidade de emprendemento

Por todo iso e conscientes da necesidade de colaboración que permita acadar os obxectivos exposto acordan formalizar este convenio coas seguintes cláusulas:

CLÁUSULAS

Primeira.- Obxecto.

Este convenio ten por obxecto establecer o marco de colaboración entre a Consellería de Economía, Emprego e Industria e a Universidade de Vigo para a realización das prácticas académicas externas, tanto curriculares como extracurriculares, do estudantado da universidade nos centros, órganos e/ou unidades da consellería.

Poderán realizar estas prácticas os/as estudantes das seguintes titulacións da Universidade de Vigo:

- Grao en Dereito
- Grao en Relacións Laborais e Recursos Humanos
- Mestrado en acceso á avogacía
- Mestrado en Dirección e Xestión Laboral

Este convenio poderá ampliarse a outras titulacións que garden relación coas prestacións competencia da Consellería de Economía, Emprego e Industria. Para estes efectos poderase asinar unha addenda a este documento.

SEGUNDA.- Centros de realización das prácticas

A Consellería de Economía, Emprego e Industria facilitará a utilización dos centros e/ou unidades que se sinalan de seguido para o cumprimento do obxectivo deste convenio:

- Servizos e oficinas da Xefatura Territorial da Consellería de Economía, Emprego e Industria en Vigo: sede da xefatura territorial, Oficina do Empregador; Servizo de Mediación, Arbitraje e Conciliación e oficinas de emprego.



A presenza dos estudantados nos ditos centros e/ou unidades non afectará de ningún xeito ao seu normal funcionamento.

TERCEIRA.- Duración das prácticas

1. A duración de las prácticas será a seguinte:

- a) As prácticas externas curriculares terán a duración que estableza o plan de estudos correspondente nos termos establecidos polo artigo 12.6 do Real Decreto 1393/2007, de 29 de outubro, polo que se establece a ordenación das ensinanzas universitarias oficiais.
- b) As prácticas externas extracurriculares terán unha duración preferentemente non superior ao cincuenta por cento do curso académico, sen prexuízo do que fixe a Universidade de Vigo, procurando o correcto desenvolvemento e seguimento das actividades académicas do estudantado.

2. Os horarios de realización das prácticas estableceranse de acordo coas características e as dispoñibilidades e os horarios dos centros da consellería. En todo caso, procurarase que sexan compatibles coa actividade académica, formativa e de representación e participación desenvolvida polo estudantado na universidade.

CUARTA.- Proceso selectivo

Para a realización das prácticas, a Universidade de Vigo seleccionará aos beneficiarios destas entre o alumnado daquelas titulacións que garden relación coas materias competencia da consellería, en función do número de prazas ofertadas pola Consellería de Economía, Emprego e Industria.

Unha vez seleccionados/as os/as estudantes a Universidade de Vigo realizara unha planificación formativa e remitirá unha proposta á consellería que poderá rexeitala de xeito motivado.

QUINTA.- Obrigas e dereitos do estudantado

Durante a realización das prácticas, o/a estudante comprometerase a cumprir as condicións concretas establecidas; a realizar as actividades que a consellería lle encomende dentro do proxecto formativo fixado; a respectar os regulamentos e as normas da consellería; a gardar



unha absoluta confidencialidade sobre os acontecementos e os documentos da consellería (mesmo unha vez finalizado o contrato de prácticas) e a manter o contacto cos seus titores.

Dado o carácter formativo das prácticas os/as estudantes non poderán asinar nin asumir responsabilidades sobre informes nin actuacións que requiran cualificación profesional.

Aos estudantes garantiráselles, en todo caso, os dereitos seguintes:

- a) A tutela, durante o período de duración da correspondente práctica, por un profesor da universidade e por un profesional que preste servizos no departamento onde se realice esta.
- b) A avaliación de acordo cos criterios establecidos pola universidade.
- c) A obtención dun informe por parte da consellería onde realizou as prácticas, con mención expresa da actividade desenvolvida, a súa duración e, se é o caso, o seu rendemento.
- d) A propiedade intelectual e industrial nos termos establecidos na lexislación reguladora da materia.
- e) A recibir, por parte da consellería, información da normativa de seguridade e prevención de riscos laborais.
- f) A cumprir coa súa actividade académica, formativa e de representación e participación, logo de comunicalo con antelación suficiente á consellería.
- g) A dispor dos recursos necesarios para o acceso dos estudantes con discapacidade á tutela, á información, á avaliación a ao propio desempeño das prácticas en igualdade de condicións.
- h) A conciliar, no caso dos estudantes con discapacidade, a realización das prácticas con aquelas actividades e situacións persoais derivadas ou conectadas coa situación de discapacidade.
- i) Gozaren dos permisos recoñecidos na legalidade vixente.

Unha vez finalizado o seu período de prácticas, o/a estudante terá que elaborar unha memoria final que entregará ao titor ou á titora académico/a. Nesta memoria final deberán recollerse as seguintes informacións:



- a) Datos persoais do ou da estudante.
- b) Entidade na que realizou as prácticas e localización do centro de traballo.
- c) Descrición concreta e polo miúdo das tarefas e os traballos desenvolvidos, así como dos departamentos da consellería a que foi asignado/a.
- d) Valoración das tarefas executadas e dos coñecementos e competencias adquiridos en relación cos estudos universitarios.
- e) Relación dos problemas xurdidos e do procedemento seguido para a súa resolución.
- f) Identificación das adquisicións que, en materia de aprendizaxe, supuxeron as prácticas.
- g) Avaliación das prácticas e suxestións de mellora.

SEXTA.- Obrigas da Consellería de Economía, Emprego e Industria

A consellería comprométese, en colaboración coa Universidade de Vigo, a fixar o proxecto formativo que levará a cabo cada estudante e a respectar os seus dereitos relativos á protección dos seus datos de carácter persoal.

En todo caso, o proxecto formativo ha de ser conforme cos principios de inclusión, igualdade de oportunidades, non-discriminación e accesibilidade universal.

As tarefas que realizarán os/as estudantes en prácticas estarán relacionadas co seu nivel de estudos e de formación académica.

Unha vez finalizadas as prácticas, a consellería expedirá ao ou á estudante un certificado acreditativo da súa realización e das súas características. Alén disto, remitirá debidamente cuberto ao centro o informe de seguimento final das prácticas en que deberán constar os seguintes aspectos:

- a) Capacidade técnica do ou a estudante
- b) Capacidade de aprendizaxe
- c) Administración e organización dos traballos
- d) Habilidades de comunicación oral e escrita. No caso daqueles estudantes con discapacidade que presentaren dificultades na expresión oral, deberá indicarse o seu



grao de autonomía para esta habilidade e se requiren algún tipo de apoio técnico e/ou humano

- e) Sentido da responsabilidade
- f) Facilitade de adaptación
- g) Creatividade e iniciativa
- h) Implicación persoal
- i) Motivación
- j) Receptividade ás críticas
- k) Puntualidade
- l) Relacións co seu entorno laboral
- m) Capacidade de traballo en equipo

SÉTIMA.- Obrigas da Universidade de Vigo

A Universidade de Vigo comprométese a pór a disposición dos/as estudantes os modelos de solicitude para participar no programa de prácticas, así como a pór a disposición da consellería os modelos para que esta lle traslade a súa oferta de prácticas.

De igual xeito, a Universidade de Vigo comprométese a convocar, difundir entre o seu estudiantado e tramitar as ofertas de prácticas que reciba da consellería no marco deste convenio.

OITAVA.- Relación entre a consellería e os/as estudantes en práctica

A realización das prácticas por parte dos/as estudantes, ao amparo deste convenio, non constitúe vínculo laboral nin contractual de ningún tipo entre estes e as partes asinantes, nin ningunha contraprestación económica durante as prácticas e non será aplicable o Estatuto dos Traballadores.

A consellería poderá interromper unhas prácticas cando considera que o/a estudante vulnerou gravemente as súas obrigas, o que lle comunicará ao ou á representante do centro e á Universidade de Vigo.

Se o/a estudante se incorpora á Administración autonómica da Xunta de Galicia ao acabar os seus estudos, o tempo de prácticas non se computará para os efectos de antigüidade, nin



eximirá do período de proba, agás que o convenio colectivo de aplicación tivese estipulado algo distinto.

NOVENA.- Tutores

Os/as estudantes en prácticas que se acolleren a este programa disporán dunha titoría académica e doutra profesional. O titor ou a titora académico/a será un/ha profesor/a da Universidade de Vigo, mentres que o titor ou a titora profesional será un/ha profesional da consellería.

Os dous tutores supervisarán as funcións levadas a cabo polos estudantes durante as súas prácticas, asistirános no que fora preciso e avaliarán o aproveitamento das prácticas.

Os tutores académicos e profesionais poderán obter da Universidade de Vigo o recoñecemento da súa actividade de conformidade coa normativa interna de aplicación.

Os tutores profesionais e académicos terán os seguintes dereitos:

- a) O recoñecemento da súa actividade colaboradora, por parte da universidade, nos termos previstos no convenio de cooperación educativa e no Regulamento de Prácticas da Universidade de Vigo.
- b) A ser informado sobre a normativa que regula as prácticas externas así como do proxecto formativo e das condicións do seu desenvolvemento.
- c) Ter acceso á universidade para obter a información e o apoio necesarios para o cumprimento dos fins propios da súa función.

Os tutores profesionais deberán cumprir as obrigas seguintes:

- a) Acoller o/a estudante e organizar a actividade que vai desenvolver de acordo co establecido no proxecto formativo.
- b) Supervisar as súas actividades, orientar e controlar o desenvolvemento da práctica cunha relación baseada no respecto mutuo e o compromiso coa aprendizaxe.
- c) Informar ao estudante da organización e funcionamento da entidade e da normativa de interese, especialmente a relativa á seguridade e riscos laborais.
- d) Coordinar co titor académico da universidade o desenvolvemento das actividades establecidas no convenio de cooperación educativa, incluíndo aquelas modificacións do plan formativo que poidan ser necesarias para o normal desenvolvemento da



práctica, así como a comunicación e resolución de posibles incidencias que poidan xurdir no seu desenvolvemento e o control de permisos para a realización de exames.

- e) Emitir os informes que corresponda.
- f) Proporcionar a formación complementaria que precise o estudante para a realización das prácticas.
- g) Proporcionar ao estudante os medios materiais indispensables para o desenvolvemento da práctica.
- h) Facilitar e estimular a achega de propostas de innovación, mellora e emprendemento por parte do/a estudante.
- i) Facilitarlle ao titor académico da universidade o acceso á entidade para o cumprimento dos fins propios da súa función.
- j) Gardar confidencialidade en relación con calquera información que coñeza do/a estudante como consecuencia da súa actividade como titor.
- k) Prestar a axuda e asistencia ao estudante, durante a súa estadía na entidade, para a resolución daquelas cuestións de carácter profesional que poida necesitar no desempeño das actividades que realiza nela.

O titor ou a titora académico/a terá as seguintes obrigas:

- a) Velar polo normal desenvolvemento do proxecto formativo, garantindo a compatibilidade de horario de realización das prácticas coas obrigas académicas, formativas e de representación e participación do estudante.
- b) Facer un seguimento efectivo das prácticas coordinándose para iso co titor da entidade colaboradora e vistos, se for o caso, os informes de seguimento.
- c) Autorizar as modificacións que se produzan no proxecto formativo.
- d) Levar a cabo o proceso avaliador das prácticas do estudantes tutelado, á vista da memoria final presentada polo/a estudante e o informe do titor ou a titora da entidade colaboradora, mediante o correspondente informe.
- e) Gardar confidencialidade en relación con calquera información que coñeza coma consecuencia da súa actividade coma titor.
- f) Informar ao órgano responsable das prácticas externas na universidade das posibles incidencias xurdidas.



- g) Supervisar e, no seu caso solicitar, a axeitada disposición dos recursos de apoio necesarios para asegurar que os estudantes con discapacidade realicen as súas prácticas en condicións de igualdade de oportunidades, non discriminación e accesibilidade universal.

DÉCIMA.- Seguro escolar

Os estudantes menores de 28 anos están cubertos polo seguro escolar obrigatorio que pagan coa matrícula. Os estudantes maiores de 28 anos deberán contratar un seguro, para os referidos efectos, de conformidade co establecido polo regulamento de prácticas académicas externas da Universidade de Vigo.

A responsabilidade civil de danos a terceiros que eventualmente puidera ocasionarse quedará cuberta pola póliza que a Universidade de Vigo ten subscrita para estes efectos.

Deste convenio non se derivará para a Consellería de Economía, Emprego e Industria nin para ningún dos seus centros ou unidades dela dependentes, ningunha obriga referente a calquera dos réximes da Seguridade Social.

DÉCIMO PRIMEIRA.- Desenvolvemento do convenio

Para cada práctica individual realizada nos centros aos que se refire o anexo I formalizarase o proxecto educativo de acordo co modelo facilitado pola Universidade de Vigo que se incorpora como anexo II, o cal poderá obterse igualmente no seguinte enlace: http://emprego.uvigo.es/opencms/export/sites/emprego/emprego_gl/documentos/novidades/d3d4_sin_RD_galego.pdf

En cada proxecto educativo figurarán os datos do convenio de referencia; os datos persoais do ou da estudante; o lugar en que se realizarán as prácticas; o nome dos titores; as datas de inicio e fin das prácticas; o total de horas e a súa distribución temporal; o proxecto formativo obxecto das prácticas que levará a cabo o/a estudante. Así mesmo, serán asinados polos estudantes, unha persoa representante da consellería e outra representante da Universidade de Vigo ou da titulación impartida.

En caso de incumprimento, a consellería poderá instar a rescisión anticipada das prácticas.

O recoñecemento académico das prácticas académicas externas realizarase de acordo coas normas e os procedementos establecidos pola Universidade de Vigo e incorporarase ao Suplemento Europeo ao Título (SET) de conformidade coa normativa de aplicación.

DÉCIMO SEGUNDA.- Establecemento dunha Comisión Mixta de Seguimento

Para o bo desenvolvemento das actividades obxecto deste convenio de colaboración establecerase unha Comisión Mixta, de composición paritaria, integrada por representantes de cada unha das institucións as que corresponderá a concreción, seguimento, interpretación e avaliación das accións derivadas do convenio e anexos.

Formarán parte desta comisión dous representantes designados pola Consellería de Economía, Emprego e Industria e dous representantes designados pola Universidade de Vigo.

Serán funcións desta Comisión de seguimento:

- Velar polo cumprimento do convenio.
- Impulsar e desenvolver o convenio.
- Concretar, seguir, interpretar e avaliar as accións derivadas do convenio.
- Adoptar ou propoñer as medidas necesarias para garantir o exercicio coordinado das competencias de cada unha das partes.
- Resolver os problemas de interpretación que poidan xurdir.

A comisión reunirse coa frecuencia que determinen os seus membros e a ela poderán ser convocados aqueles técnicos que, con carácter asesor, designen as partes.

DÉCIMO TERCEIRA.- Modificación e extinción do convenio

a) Modificación:

As partes poderán modificar este convenio por mutuo acordo cando resulte necesario para a mellor realización do seu obxecto. Para a ampliación das titulacións da Universidade de Vigo nas que deben estar matriculados os/as estudantes formalizarase



o acordo a través dunha addenda. Noutros casos, o acordo de modificación requirirá a sinatura dun novo instrumento xurídico.

b) Extinción:

O convenio extínguese polo cumprimento das actuacións que constitúen o seu obxecto ou por incorrer nalgunha das seguintes causa de resolución:

- O transcurso do seu prazo de vixencia.
- O acordo unánime dos asinantes.
- O incumprimento das obrigas e compromisos asumidos por parte dalgún dos asinantes.
- Neste caso, calquera das partes poderá notificar á parte incumplidora un requirimento para que cumpra no prazo de dez días naturais coas obrigas ou compromisos que se consideren incumplidos. Este requirimento será comunicado tamén á comisión de seguimento do convenio. Se transcorrido o prazo indicado no requirimento persistira o incumprimento, a parte que o dirixiu notificará a outra parte asinante a concorrencia da causa de resolución e entenderase resolto o convenio.

DÉCIMO CUARTA.- Réxime xurídico e resolución de conflitos

O convenio ten natureza administrativa e rexerase pola Lei 40/2015, de 1 de outubro, de Réxime xurídico do sector público, pola Lei 39/2015, de 1 de outubro, de Procedemento administrativo común das Administracións Públicas, o Real Decreto 592/2014, de 11 de xullo, polo que se regulan as prácticas académicas externas dos estudantes universitarios e polas demais normas de dereito administrativo e, no seu defecto, polas normas de dereito privado.

Os conflitos e controversias que puidesen formularse sobre a súa interpretación e execución deberán resolverse de mutuo acordo entre as partes a través da Comisión Mixta de Seguimento. De non acadarse tal acordo, as cuestións litixiosas que poidan xurdir na interpretación e cumprimento do convenio de colaboración, serán de coñecemento e competencia da orde xurisdiccional contencioso-administrativa.

DÉCIMO QUINTA.- Publicidade e rexistro do convenio

Estarase ao disposto no artigo 15 da Lei 1/2016, do 18 de xaneiro, de transparencia e bo goberno, sobre as obrigas específicas de información sobre convenios. A sinatura do convenio leva implícita a autorización para o tratamento necesario dos datos e a referida publicidade.

Asemade, procederase á inscrición do convenio no Rexistro de Convenios, de conformidade co establecido no artigo 5 do Decreto 126/2006, do 20 de xullo, polo que se regula o Rexistro de Convenios da Xunta de Galicia.

DÉCIMO SEXTA.- Protección de datos

Das actividades realizadas nos centros e/ou unidades, ambas as partes garanten a total confidencialidade dos datos persoais e familiares aos que teñan acceso, garantindo o total cumprimento do disposto na Lei Orgánica 15/1999, do 13 de decembro, de protección de datos de carácter persoal. Igualmente comprométense a observar o establecido na Lei 39/2015, do 1 de outubro, do procedemento administrativo común das administracións públicas e na Lei 40/2015, do 1 de outubro, de réxime xurídico do sector público no que se refire ao acceso limitado aos propios interesados, en relación cos documentos que conteñan datos referentes á intimidade das persoas.

Así mesmo, os datos relativos aos centros dependentes da xefatura territorial desta consellería (o seu funcionamento, actividades, programas, persoal, etc.) que o alumnado universitario puidese coñecer e utilizar en traballos de natureza académica non poderán facerse públicos de ningún modo e, por suposto, en ningún medio de comunicación público ou privado, agás que a Consellería de Economía, Emprego e Industria o autorice expresamente.

Ambas as dúas partes acordan someterse en canto ao tratamento dos datos persoais dos/as estudantes que teñan acceso a estas prácticas ao establecido na normativa vixente en materia de protección de datos de carácter persoal. Sen prexuízo de que a Consellería de Economía, Emprego e Industria poida solicitar o consentimento do/a interesado/a para incorporar os seus datos persoais a un ficheiro propio do que sexa responsable, terá en todo caso a consideración de encargado de tratamento por conta da Universidade de Vigo

respecto dos datos persoais dos/as estudantes en prácticas que sexa necesario tratar para cumprir coas finalidades previstas neste convenio. As correspondentes convocatorias advertirán aos/as interesados/as destas circunstancias.

DÉCIMO SÉTIMA.- Vixencia do convenio

Este convenio terá unha vixencia de catro anos que se contará dende a data da súa sinatura.

Poderá prorrogarse por outro prazo igual co establecido de xeito inicial.

E, en proba de conformidade cos termos deste convenio, as partes asinan dous exemplares del.

Pola Consellería de Economía, Emprego e Industria

Pola Universidade de Vigo



Prácticas que se ofertan aos estudantes nos distintos servizos da Xefatura Territorial de Economía, Emprego e Industria

SERVIZO DE EMPREGO E ECONOMÍA SOCIAL

Nº de alumnos en prácticas: 3 en cada período bimensual (en-feb/mar-ab)

Perfil: Grao en Dereito ou Grao en Relacións Laborais e Recursos Humanos.

Localización:

- 2 na Delegación Territorial da Xunta Galicia en Vigo. Xefatura Territorial da Consellería de Economía, Emprego e Industria
- 1 na Oficina do Servizo de Mediación, Arbitraje e Conciliación de Vigo (en réxime de rotación)

Formación: prácticas na realización de informes de carácter xurídico-laboral, expedientes de regulación de emprego, eleccións sindicais, sociedades anónimas laborais, altas e baixas de empresa, conciliación; convenios.

Comunicación de aperturas de centros de traballo; relación co Gabinete de Seguridade e Hixiene de Rande. Prácticas en materia de dereito de subvencións, tramitación de subvencións.

SERVIZO DE ORIENTACIÓN E PROMOCIÓN LABORAL

Nº de alumnos en prácticas: 10 cada período bimensual (en-feb/mar-ab)

Perfil: Grao en Dereito ou Grao en Relacións Laborais e Recursos Humanos.

Localización

- 1 Delegación Territorial da Xunta en Vigo. Xefatura Territorial da Consellería de Economía, Emprego e Industria
- 8 en oficinas de emprego (4 en Vigo, 1 en Pontevedra, 1 en Cambados, 1 en Porriño, 1 en Cangas)
- 1 no Centro do Empregador (Vigo).

Formación: prácticas en funcionamento dunha Oficina de emprego, o proceso de orientación laboral, xestión da oferta e demanda, tramitación de subvencións en materia de



formación para a colocación; expedientes de emprego autónomo.

SERVIZO DE CONSUMO

Nº de alumnos en prácticas: 2 cada período bimensual (en-feb/mar-ab)

Perfil: Grao de Dereito

Localización:

- 2 na Delegación Territorial da Xunta de Galicia en Vigo. Xefatura Territorial da Consellería de Economía, Emprego e Industria

Formación: prácticas en materia dos dereitos dos consumidores e usuarios, realización de informes de carácter xurídico, resolución de recursos, asistencia ás arbitaxes en materia de consumo, preparación de expedientes litixiosos.

SERVIZO DE COORDINACIÓN INDUSTRIAL

Nº de alumnos en prácticas: 1 cada período bimensual (en-feb/mar-ab)

Perfil: Grao en Dereito ou Grao en Relacións Laborais e Recursos Humanos.

Localización:

- 1 na Delegación Territorial da Xunta en Vigo. Xefatura Territorial da Consellería de Economía, Emprego e Industria

Formación: Prácticas nos coñecementos sobre a lexislación autonómica en materia de Comercio, autorizacións para a realización de actividades industriais e expropiacións

Expedientes sancionadores. Resolución de Recursos administrativos. Expedientes de autorización. Procedemento administrativo de expropiación. Tramitación de subvencións. O labor de inspección.